

Wárágà Yòwánì dré tisìle dhi ni àlo

Wárágà kònìdhi ni tà àndu ngìle drìdrì dhi

A adré kisùá dhi, dhya wárágà kònìdhi ni tisìlepi dhi tá Yòwánì, àpóstolò kì àlo 'i, ìndì Èkèlézyà ni drì kobhá kàdrì dhi kì àlo 'i. Tágba à dré adrézó Yòwánì nda ni rú kisú wárágà kònìdhi léna ko dhi, à ni kitswá nòá ngádra 'á dhi, dhya wárágà kònìdhi ni tisìlepi dhi tá dhya Yésu ni tà nobhá mǐ sè dhi kì àlo 'i (1:1-4).

Yòwánì adré wárágà kònìdhi ni tisì tà kàdrìkàdrì rǐ dhi i sè. Alo ni, adré móndyá ka'ìbhá dhi kì kodzó tàzoá dhi, ngóro ì dré ru amulé Gìká Atá be, ìndì akódhi ni Mvá, Yésu Krísto be dre dhi tíni dhi, lè ì kàdré adrélé àyi léna. Ì kàdré kpà tròle tà ì dré yìle àpóstolò i tí dhi i rú. Adré kpà tàá dhi, dhya ángùdhi Gìká ni nìlepi bàti dhi ni kpà akódhi ni tòlí kì ka'ì 'òle. Kòdhi adré tàá dhi, ì ni Gìká ni Mváagó, Yésu Krísto ni ka'ì, adrézó kpà ru le àyi kòfalésè. Tàko ko, Gìká ni tàndi lèle 'i (3:11-24; 4:7-21).

Rǐ ni, Yòwánì adré àyi kì kodzó, ì kàdréro àyi kì líkì tà pròfétà kinzò ro dhi ì dré adrélé tadhále dhi kì tà sè. Adré tàá dhi, ì kàdré móndyá títi dhi kì tabhì, nǐzoá ngalè tírì àyi léna dhi i Tírì Gìká àdhya 'i bàti yà dhi (4:1-6). Adré kpà àyi kì kodzó tàzoá dhi, ì lavú bvò kònìdhi dre, ìndì Tírì adrélépi àyi lé dhi kàdrì, tírì adrélépi bvò kònìdhi lé dhi ni lavú (4:4).

Tà kàdrìkàdrì wárágà kònìdhi léna dhi ki atìma

- 1) Kúlí adrélépi lídrì fe dhi (1:1-4)
- 2) Ngádra i tìnímvá be dhi (1:5-2:29)
- 3) Giká ni ànzi i Dzáborò kya íbe dhi i (3:1-24)
- 4) Tà bàti i kìnzò be dhi (4:1-6)
- 5) Giká ni lèle, ìndì ru lèma àma kòfalèsè dhi (4:7-21)
- 6) Giká ni Mvágó ni ka'ima (5:1-21)

Kúlí adrélépi lídrì fe dhi

¹ Mà adrè dhya adrélépi tá be kínó tà tíí dhi ki kidhoma lésè, mà dré yìle, mà dré nòle mì sè, mà dré tabèle, ìndì mà dré tà ni ni kisùzo dhi ni tà longó kòdhya. Akódhi nda Kúlí adrélépi lídrì fe dhi 'i.

² Lídrì nda apfò tá àma kòfalé gò, mà dré nòzoá. Dì mà adrè tà mà dré nòle mì sè nda ni tà ta, adrézó lídrì kóná vèsè kólyá adrélépi tá Giká Atá véna gò, dré apfòzo àma kòfalé nda ni tà longó kòdhya.

³ Mà adrè tà mà dré nòle ìndì mà dré yìle nda ni longó àmi dré, mì kàmúró kpà ru àma íbe adrélé tùmání be dhi bvó. Ama, mà amú ru Giká Atá be, ìndì akódhi ni Mvágó, Yésu Krísto be dre.

⁴ Mà adrè tà kòdhi ki tisi, mà kàdréró lenzélé tùmání àmi íbe kitswálé tíí.

Atsima ngádra 'ásè dhi

⁵ Tà mà dré yìle Yésu Krísto nda tí gò, mà dré adrézó longóá àmi dré dhi, tà kònìdhi 'i: Giká ngádra 'i, ìndì akódhi léna dhi, tìnímvá àlomvá yókódhó.

⁶ Mǎ kàdré tàá dhi, mà amú ru Gĩká be dre gò, mà dré adrézó atsílé tìnímvá na dhi, kòdhi mà adré kinzò ta, ìndì mà adré atsílé tà bàti na ko.

⁷ Dì, mà kàdré àmakya atsílé ngádra 'ásè ngóró Gĩká nì tàndì dré adrélé ngádra 'á dhi tìni dhi, mà amú ru àma kòfalésè gò, akódhi nì Mvǎ, Yésu nì kàrí dré adrézó àma kì temvé tàkonzì wǎyi dhi ì lése.

⁸ Mǎ kàdré tàá dhi, àma tàkonzì àko dhi, kòdhi mà adré àma kì tàndì kì lití, ìndì tà bàti àma léna yókódhó.

⁹ Dì, mà kàdré àma kì tàkonzì kì ta ngádra 'á Gĩká kandrá dhi, akódhi nì àma kì tàkonzì nda kì tri gò, àma kì temvézó àma kì tà kònzì wǎyi dhi ì lése. Tàko ko, akódhi gyǎgya, ìndì kitswá adrélé ka'ile togó wǎyi sè.

¹⁰ Mǎ kàdré tàá dhi, mà 'o tàkonzì ko dhi, mà adré Gĩká nì bha kinzò líyí ro, adrézó kpà tadhá dhi, akódhi nì kúlí àma léna yókódhó.

2

Krístico, dhya adrélépi àma kì tàrá ga dhi 'i

¹ Àma ànzì ì, má adré tà kòdhi kì tisì àmi dré, mà kò'oró tàkonzì ko dhi bvó. Dì, dhya àlo kò'o tàkonzì dhi, àma dhya adrélépi àma kì tàrá ga Gĩká Atá kandrá dhi íbe. Akódhi nda Yésu Krístico, dhya adrélépi gyǎgya dhi 'i.

² Gĩká afè akódhi dràle mòbòmà ro, àma kì tàkonzì kì trizo ásà. Ngbà 'í tàkonzì àmakya 'i ko, afè akódhi dràle mónnyá títi bvò àdhya kì tàkonzì kì trizo.

³ Mǎ kàdré Gĩká nì tòlí kì ka'í 'òle dhi, mà nǐ tàle dhi, mà nǐ akódhi bàti dhi be.

⁴ Dhya adrélépi tàá dhi «Má nǐ akódhi be» gò, dré adrézó akódhi nǐ tòlí kǐ ka'í 'òle ko dhi, dhya nda kǐnzò líyí 'í, ìndì tà bàti akódhi léna yókódhó.

⁵ Dì, dhya adrélépi ína akódhi nǐ kúlí ka'í 'òle dhi adré tadhá dhi, Gíká nǐ lèle ga akódhi léna kǐtswálé tíí. Tà kòdhi sè dhi, mà nǐ tàle dhi, àma akódhi léna dhi be.

⁶ Lè dhya ángùdhi adrélépi tàá dhi, í adré adrélé akódhi léna dhi, kàdré atsilé ngóró Yésu nǐ tàndi dré atsilé dhi tíni.

Tòlí tídhí ro dhi

⁷ Àma arúpi má dré lèle tò nǐ í, má adré tòlí tídhí ro dhi nǐ tisì àmi dré kòdhya ko. Be ró dhi, tòlí má dré adrélé tisìle kòdhi, tòlí àku mǐ dré kǐsúlé adrézó ába kǐdhóle kǐdhoma lésè dhi 'í. Tòlí àku nda kúlí mǐ dré yìle dre dhi 'í.

⁸ Tágba kònìni dhi, má adré kpà tòlí tídhí ro dhi nǐ tisì àmi dré kòdhya. A nǐ kǐtswá tà bàti tòlí nda àdhya nǐ no Krísto na, ìndì àmi léna. Tàko ko, tínímvá adré akíle, ìndì ngádra bàti dhi kǐdhó adrélé nga kazá dre.

⁹ Dhya adrélépi tàá dhi, í ngádra 'á gò, dré adrézó togó kònzi bha áyi adrúpi rú dhi, dhya nda dhu rè tínímvá na.

¹⁰ Dhya adrélépi áyi adrúpi nǐ le dhi adré atsilé ngádra 'ásè, ìndì tà àlo kǐtswálépi akódhi nǐ 'o dhèle dhi akódhi léna yókódhó.

¹¹ Dì, dhya adrélépi ína togó kònzi bha áyi adrúpi rú dhi, dhu rè tínímvá na, ìndì adré atsilé tínímvá na. Akódhi nda nǐ ngalè í adré lèle ángolé ya dhi ko. Tàko ko, tínímvá nda 'o akódhi nǐ mǐ adùle dre.

12 Ami, áma ànzì i, má adrè tà tìsì àmi dré,
Gìká dré àmi kí tàkonzì trìle Krìsto nì rú sè dhi
sè.

13 Ami, ànzì kí atá i, má adrè tà tìsì àmi dré,
mì dré dhya adrélèpi be tà títi dhi kí kidhoma
lésè dhi nì nìle be dhi sè.

Ami, tódhíbhá i, má adrè tà tìsì àmi dré,
mì dré Dhya kònzì nì lavulé dre dhi sè.

14 Ami, áma ànzì i, má tìsì tà àmi dré,
mì dré Gìká Atá nì nìle be dhi sè.
Ami, ànzì kí atá i, má tìsì tà àmi dré,
mì dré dhya adrélèpi be tà títi dhi kí kidhoma
lésè dhi nì nìle be dhi sè.

Ami tódhíbhá i, má tìsì tà àmi dré,
mì dré adrélè rìnyi ró dhi sè,
Gìká nì kúlí dré adrélè àmi léna dhi sè,
ìndì mì dré Dhya kònzì nì lavulé dre dhi sè.

Bvò kònìdhi nì tà lèma ko dhi

15 Lè mì kàdré bvò kònìdhi 'i yà, kó ngalè tà bvò
kòndì àdhya 'i yà dhi kí le ko. Dhya àlo kàdré tà
bvò kòndì àdhya kí le dhi, Gìká Atá nì lèle akódhi
léna yókódhó.

16 Tàko ko, tà bvò kòndì àdhya i, tà kòni 'i: lovó
kònzì rúbhá àdhya i, lovó kònzì ngá adrélè nòle
mì sè dhi i sè dhi i, ìndì dhyá kí afàma ngá adrézó
ába dhi kí tà sè dhi. Tà nda kòdhi ì adrè angálé
Gìká Atá vélésè ko. Be ró dhi, ì adrè àyíkya
angálé bvò kònìdhi lésè.

17 Bvò kònìdhi ì lovó kònzì bvò kòndì àdhya íbe
dhi ì adrè akílé akíakí. Dì, dhya adrélèpi tà Gìká
dré adrélè lèle í kò'o dhi kí 'o dhi, nì ína adrè
lídri íbe kóná vésè kólyá.

Krīsto ni kàribhá ni atsama

¹⁸ Ama ànzì ì, lókyá ándrò kònìdhi lókyá kùdù 'i. Mì yi tàle dhi, Krīsto ni kàribhá ni dra atsá dhi 'í. Dì ndìndì nyànomvá dhi, Krīsto ni kàribhá bí dhi ì apfò dre. Tà nda sè dhi, mà nǐ tàle dhi, kònìdhi lókyá kùdù 'i dhi be.

¹⁹ Móndyá nda ì pfò àma ki tàndi ì kòfalésè. Dì, àyi tá àyikya móndyá àmakya 'i ko. Tàko ko, ì kàdré tá móndyá àmakya 'i dhi, kònò ì ni tá adré ngbú túmání àma íbe. Dì, àyi ki pfòma nda adré ína tadhá dhi, àyi ki àlo tá àmakya 'i ko.

²⁰ Dì, àmi ró dhi, àmi àmikya Tirí Lólo Krīsto dré kutulé àmi dri dhi íbe gò, àmi títi mì dré tà bàti nǐzo.

²¹ Má adré tà tisì àmi dré, mì dré tà bàti nǐle ko dhi sè ko. Be ró dhi, má adré tà tisì àmi dré, mì dré tà bàti nǐle be dhi sè, ìndì tà àlo kinzò ro dhi dré adréle angále tà bàti nda lésè ko dhi sè.

²² Dì kinzò líyí ína àdhi 'i? Akódhi dhya adrélépi tàá dhi, Yésu Mèsíyà 'i ko dhi 'i. Dhya nda Krīsto ni kàribhá 'i. Adré Gìká Atá ni ga, akódhi ni Mv́a be.

²³ Tàko ko, dhya ángùdhi adrélépi Gìká ni Mv́a ni ga dhi, akódhi Gìká Atá íbe í léna ko. Dhya ángùdhi adrélépi Gìká ni Mv́a ni ka 'i dhi, akódhi kókpa Gìká Atá íbe í léna.

²⁴ Àmi ró dhi, lè mì kàdré tà mì dré tá yǐle kidhóle kidhoma lésè dhi ki líkí adréle àmi léna. Tàko ko, tà mì dré yǐle nda ì kàdré àmi léna dhi, àmi ki tàndi mì ni kpà adré Gìká ni Mv́a na, ìndì Gìká Atá na.

²⁵ Tà Krīsto dré lazíle àma dré dhi, tà kònìdhi 'i: lídrì kóná vésè kólyá dhi.

²⁶ Má adré tà kòdhi ki tìsì àmi dré móndí adrébhá láti nda kitswázó àmi ki lití dhi ki tà sè.

²⁷ Dì, àmi ró dhi, mì kisú Krísto ni Tirí dré kutulé àmi dri dhi gò, Tirí nda dré adrézó àmi léna. Asà dhi, lè dhya àlo kògò adrélé tà tadhá àmi dré ko. Tàko ko, Krísto ni Tirí nda adré tà títi dhi ki tadhá àmi dré nì. Tà dré adrélé tadhále nda i tà bàti 'i, kinzò 'i ko. Dì ngóro Tirí nda dré tadhále àmi dré dre dhi tíni dhi, mì kàdré adrélé Krísto na.

Gìká ni ànzi i

²⁸ Dì nyànomvá dhi, áma ànzi i, lè mì kàdré adrélé Krísto na, akódhi kònì dra apfò dhi, mà kògaró tà mà dré ka'ile bàti dhi sè bǐ, adrélé kanyò àko akódhi kandrà kítú dré dra agòzo dhi tú.

²⁹ Mì nǐ tàle dhi, akódhi gyägya dhi be. Asà dhi, mì nǐ kpà tàle dhi, dhya ángùdhi adrélépi tà gyägya 'o dhi, móndí akódhi dré ùle dhi 'i dhi be.

3

¹ Mì kisù rè lèle kàdrì Gìká Atá dré tadhále àma véle, à kàdréro àma ki zi akódhi ni ànzi i ró dhi ká! Dì àma akódhi ni ànzi 'i bàti. Móndyá bvò kòndi àdhya ì nǐ àma àdhibhá 'i ya dhi ko, ì dré kpà Gìká Atá ni nǐle ko dhi sè.

² Àma arúpi má dré lèle tò ni i, nyànomvá dhi, àma Gìká ni ànzi 'i. A tadhá dhu rè mà ni adré ngini ya dhi ko. Dì, mà nǐ àmakya tà kòndhi kòdhya: Krísto kònì dra apfò dhi, mà ni adré akódhi tíni. Tàko ko, mà ni akódhi ni no ngóro dré adrélé dhi tíni.

³ Dhya ángùdhi adrélépi mǐ bha Ğiká véna tà nda kòdhi sè dhi, adré áyi tàndi ni temvé, ngóró Krísto ni tàndi dré adrélé lólo dhi tǐni.

⁴ Dhya ángùdhi adrélépi tàkonzì 'o dhi adré Ğiká ni tátrítrí kúlí ño. Tàko ko, tàkonzì 'òma ína ligíma Ğiká ni tátrítrí kúlí rú dhi 'i.

⁵ Di, mǐ nǐ tàle dhi, Krísto apfò kitswálé àma ki tàkonzì tingá dhi be. Mǐ nǐ kpà tàle dhi, tàkonzì akódhi léna yókódhó dhi be.

⁶ Dhya ángùdhi adrélépi adrélé akódhi léna dhi kitswá gòle adrélé tàkonzì 'o ko. Dhya ángùdhi adrélépi tàkonzì 'o dhi nò akódhi rè ko, ìndì nǐ kpà akódhi ko.

⁷ Àma ànzì i, mǐ kòtayí àmi dhya àlo dré litílé ko. Dhya ángùdhi adrélépi tà gyǎgya 'o dhi gyǎgya, ngóró Krísto ni tàndi dré adrélé gyǎgya dhi tǐni.

⁸ Di, dhya adrélépi tàkonzì 'o dhi ína móndí Dzáborò àdhya 'i. Ángyá ko, Dzáborò nda adré tàkonzì 'o kídhólé kídhoma lésè. Tà nda sè dhi, Ğiká ni Mvágó apfò kitswálé tà Dzáborò dré adrélé 'òle dhi ki pfu akílé dhi bvó.

⁹ Dhya ángùdhi Ğiká dré òle atsálé áyi mvá ro dhi kitswá gòle adrélé tàkonzì 'o ko, Ğiká ni tàndi ni lídrì dré adrélé akódhi nda léna dhi sè.* Dhya nda kitswá gòle adrélé tàkonzì 'o bwà ko, Ğiká dré akódhi ni òle nǐ dhi sè.

¹⁰ Mà ni kitswá Ğiká ni ànzì ki ni lanzílé Dzáborò ni ànzì íbe, tà kòndhi sè: Dhya ángùdhi adrélépi tà gyǎgya 'o ko dhi, Ğiká ni mvá 'i ko.

* **3:9 3:9** Ğiká ni Kúlí tisìle Ğirikì ti sè dhi adré tàà kònwa dhi: «Ğiká ni kòrì dré adrélé akódhi nda léna dhi sè.»

Dhya adrélépi áyi adrúpi ni le ko dhi kókpà Gĩká ni mvá 'i ko.

Ru lèma àma kòfalésè dhi

11 Tà mì dré yìle kidhólé kidhoma lésè dhi, tà kònìdhi 'i: Lè mà kàdré ru le àma kòfalésè.

12 Lè mà kàdré tà 'o Kàyínà àdhya tìni ko. Akódhi nda tá mómí Dhya kònzi àdhya 'i gò, dré áyi adrúpi ni pfùzo dràle. Di, pfu tá áyi adrúpi nda dràle àdho tà sè? Pfu akódhi dràle, áyi tà 'òle dhi ì dré tá adrélé kònzi dhi sè, ìndì áyi adrúpi ni tà 'òle dhi ì dré tá adrélé gyäggya dhi sè.

13 Ama adrúpi i, mómíyá bvò kòndi àdhya ì kàdré togó kònzi bha àmi rú dhi, lè àmi ki líndrì kàdré gàle ásà ko.

14 Mà nì tàle dhi, mà apfò dràdrà lésè afflé lídrì le dre dhi be, mà dré adrélé àma ki adrúpi ki le dhi sè. Dhya adrélépi mómí ki le ko dhi dhu rè rìnyí dràdrà àdhya zàle.

15 Dhya ángùdhi adrélépi togó kònzi bha áyi adrúpi rú dhi, mómí pfùlepi dràle dhi 'i. Di mì nì tàle dhi, mómíyá adrèbhá mómí pfu dràle dhi ki àlo lídrì kóná vésè kólyá dhi íbe í léna ko dhi be.

16 Mà ni kitswá nǎá ngalè lèle àdho 'i ya dhi, tà kònìdhi sè: Yésu Krísto fè tá áyi tàndi ni lídrì àma ki tà sè. Adré di leá dhi, mà kàdré kókpà àma ki lídrì fe àma ki adrúpi ki tà sè.

17 Dhya àlo adrélépi ngá íbe dhi kàdré áyi adrúpi ni no adrérà'a lemerè ro gò, dré adrézó kizà ni ni bha ko dhi, Gĩká ni lèle ni kitswá adrélé akódhi nda léna ngínìngìni ró?

18 Ama ànzì ì, lè mà kàdré mómndí kì le ngbà 'í kúlí ì sè ko, ìndì ti sè ko. Be ró dhi, mà kàdré àmakya mómndí kì le tà mà dré adrélé 'òle dhi ì sè ìndì tà bàti sè.

19 Mà kàdré 'òá kònìni dhi, mà ni nǎá dhi, àma mómndí tà bàti àdhya 'ì dhi be. Mà ni kitswá kpà àma kì togó bha adrélé kàdríkàdri Gìkà kandrà.

20 Dì, àma kì togó kàdré àma kì arókì, adrézó tà bha àma dri dhi, mà nǎ tàle dhi, Gìkà kàdri àma kì togó lavú, ìndì akódhi nǎ tà tíí dhi be.

21 Ama arúpi má dré lèle tò ni ì, àma kì togó kàdré tà bha àma dri ko dhi, mà ni adré gàle tà mà dré ka'ìle bàti dhi sè bǐ Gìkà kandrà.

22 Mà adré kpà tà ángùdhi mà dré adrélé zìle akódhi tí dhi ni kisú, mà dré adrélé akódhi ni tòlí kì ka'ì 'òle dhi sè, ìndì mà dré adrélé tà akódhi ni togó dré adrézó kiníle ásà dhi kì 'o dhi sè.

23 Dì tòlí Gìkà dré afèle àma dré dhi, kònìdhi 'ì: Mà kòka'ì akódhi ni Mvágó Yésu Krísto, adrézó kpà ru le àma kòfalésè, ngóro dré tá tàle mà kò'o dhi tíni.

24 Dhya ángùdhi adrélépi Gìkà ni tòlí kì ka'ì 'òle dhi adré adrélé akódhi léna. Gìkà adré kpà adrélé dhya nda léna. Mà ni kitswá nǎá dhi, Gìkà adré adrélé àma léna dhi, tà kònìdhi sè: Mà ni nǎá Tirí Lólo Gìkà dré afèle àma dré dhi sè.

4

Tirí mómndí ì lé dhi kì tabhìma

1 Ama arúpi má dré lèle tò ni ì, lè mǐ kàdré mómndyá tíí adrèbhá tàá dhi, àyi Gìkà ni Tirí íbe àyi léna dhi kì ka'ì ko. Be ró dhi, mǐ kàdré àyi nda kì tabhì, nǐzoá ngalè tirí àyi lé dhi ì angá

Gìká vélésè bàti yà dhi. Tàko ko, pròfètà kinzò ro bǐ dhi ì apfò ayílé bvò wǎyi 'ásè dre.

² Mì ni ò kitswá nǎa ngalè tirí àyi lé nda ì Tirí Gìká àdhya 'i yà dhi, tà kònìdhi sè: Dhya ángùdhi adrélépi ka'íá tàle dhi, Yésu Krísto atsá bvò kònìdhi 'á mómí ro káyà dhi, dhya nda Tirí Gìká àdhya íbe í léna.

³ Dì, dhya ángùdhi adrélépi Yésu ni tà ga rè dhi, dhya nda Tirí Gìká àdhya àko í léna. Tirí akódhi nda léna dhi, tirí Krísto ni kàribhá àdhya 'i. Mì yi tàle dhi, Krísto ni kàribhá nda adrè alìle. Dì akódhi nda atsá adrélé bvò kònìdhi lé dre.

⁴ Dì, àma ànzi ì, àmi àmíkya mómí Gìká àdhya 'i. Mì lavú kpà pròfètà kinzò ro nda ì dre. Tàko ko, Tirí adrélépi àmi lé dhi kàdrì, tirí adrélépi bvò kònìdhi lé dhi ni lavú.

⁵ Ayi nda ì mómíá bvò kòndi àdhya 'i. Asà dhi, ì adrè tà ta ngóro mómíá bvò kòndi àdhya kya tìni gò, mómíá bvò àdhya ì dré adrézó àyi kǐ kúlí yi.

⁶ Dì, àma àmakya mómí Gìká àdhya 'i. Dhya ángùdhi Gìká ni nǐlepi be dhi adrè àma kǐ kúlí yi. Dì, dhya ángùdhi adrélépi Gìká àdhya ró ko dhi adrè ína àma kǐ kúlí yi ko. Tà nda kòdhi sè dhi, mà ni kitswá Tirí tà bàti àdhya ni ni lanzílé tirí kinzò àdhya be.

Gìká lèle 'i

⁷ Àma arúpi má dré lèle tò ni ì, mà kàdré ru le àma kòfalésè. Tàko ko, lèle adrè angálé Gìká vélésè. Dhya ángùdhi adrélépi mómí kǐ le dhi, akódhi nda Gìká ni mvá 'i. Akódhi nǐ kpà Gìká be.

⁸ Dhya ángùdhi adrélépi móndí ki le ko dhi nǎ ina Gĩká ko. Tàko ko, Gĩká lèlè 'i.

⁹ Gĩká tadhá áyi lèlè àma véle dhi tà kònìdhi sè: Amù áyi Mváagó àlo kwákwá dhi alìle bvò kònìdhi lé, mà kòkìtswáró lídrì kisú akódhi sè be dhi bvó.

¹⁰ A adré lèlè nda ni no tà kònìdhi sè: Mà lè tá Gĩká àma ko. Be ró dhi, akódhi lè ina àma nì gò, áyi Mváagó ni amùzo kitswálé dràle mòbòmà ro, àma ki tàkonzì ki trizo ásà.

¹¹ Àma arúpi má dré lèlè tò ni i, Gĩká kòlè àma tò kònìni dhi, lè mà kàdré kókpà ru le àma kòfalésè.

¹² Dhya àlo nò rè tàdzí Gĩká ko. Di, mà kàdré ru le àma kòfalésè dhi, kòdhi adré tadhá dhi, Gĩká adré adrélé àma léna, ìndì akódhi 'o áyi lèlè gàle àma léna kitswálé títi.

¹³ Mà ni kitswá nǎa dhi, mà adré adrélé Gĩká léna, ìndì akódhi adré adrélé àma léna dhi, tà kònìdhi sè: Dré áyi Tírì afèle àma dré dhi sè.

¹⁴ Mà nò tà kòdhi mì sè gò, mà dré adrézó longóá dhi, Gĩká Atá amù áyi Mváagó adrélé móndyá bvò àdhya ki tídrílépi ró.

¹⁵ Dhya àlo kàdré ka'íá tàle dhi, Yésu Gĩká ni Mváagó 'i káyà dhi, Gĩká adré adrélé dhya nda léna, ìndì akódhi nda adré adrélé Gĩká léna.

¹⁶ Di àma, mà nǎ lèlè Gĩká dré tadhálé àma véle dhi be gò, mà dré adrézó ka'íá.

Gĩká lèlè 'i. Dhya ángùdhi adrélépi atsilé lèlè na dhi, adré adrélé Gĩká léna, ìndì Gĩká adré adrélé akódhi nda léna.

¹⁷ Tà nda sè dhi, lèlè nda adré tà 'o àma kòfalé kitswálé títi, mà kògaró tà mà dré ka'íle bàti dhi

sè bǐ Gǐká kandrǎ, kǐtú dré dra tàbvó tàzo dhi tú. Tàko ko, àma kǐ lídrǐ bvò kònìdhi lé dhi ngóró Krísto àdhya tǐni.

¹⁸ Lèle na dhi, tirǐ yókódhó. Be ró dhi, lèle kitswálépi títí dhi adré ína tirǐ dro. Dhya ángùdhi adrélépi ngá ro dhi, lèle ga rè akódhi nda léna kitswálé títí ko. Tàko ko, akódhi adré ngá ro, à ni dra tà ño í dri dhi sè.

¹⁹ Ama ró dhi, mà adré móndí ki le, Gǐká dré zya àma kǐ lèle drǐdrǐ nì dhi sè.

²⁰ Dhya àlo kàdré tàá dhi «Má adré Gǐká ni le» gò, dré adrézó togó kònzi bha áyi adrúpi rú dhi, akódhi nda kinzò líyí 'i. Tàko ko, dhya adrélépi áyi adrúpi í dré adrélé nòle mǐ sè dhi ni le ko dhi, kitswá ína Gǐká í dré adrélé nòle mǐ sè ko dhi ni le bwà ko.

²¹ Dǐ tólí Gǐká dré afèle àma dré dhi, kònìdhi 'i: Lè dhya adrélépi Gǐká ni le dhi kàdré kókpà áyi adrúpi ni le.

5

Gǐká ni Mvágó ni ka'ima

¹ Dhya ángùdhi adrélépi ka'íá dhi Yésu Mèsíyà 'i káyà dhi, akódhi nda Gǐká ni mvá 'i. Dhya ángùdhi adrélépi ànzi kǐ atá ni le dhi, adré kókpà akódhi ni ànzi kǐ le.

² Mà ni kitswá nǐá dhi, mà adré Gǐká ni ànzi kǐ le dhi, tà kònìdhi sè: Mà dré adrélé Gǐká ni le dhi sè, ìndì mà dré adrélé akódhi ni tólí kǐ 'o dhi sè.

³ Tàko ko, mà kàdré Gǐká ni le bàti dhi, mà ni akódhi ni tólí kǐ ka'í 'òle. Akódhi ni tólí nda kǐ 'òma kòkóròko àma dré ko.

4 Angyá ko, dhya adrélépi Giká ni mvá ro dhi lavú bvò kònìdhi dre. Tà mà dré adrézó bvò kònìdhi ni lavú ásà dhi, àma kì tà ka'ika'ì 'i.

5 Di àdhi ni kitswá bvò kònìdhi ni lavú dhi nì? Ngbà 'í dhya adrélépi ka'íá tàle dhi, Yésu Giká ni Mváagó 'i dhi 'i.

Tà longólé Yésu Krísto ni tà dri dhi

6 Yésu Krísto, dhya atsá lépi bvò kònìdhi 'a kitswá lé bàtìsimò do, ìndì kitswá lé kàrí kutú dhi 'i. Akódhi atsá tá ngbà 'i bàtìsimò do ko. Be ró dhi, atsá ína kitswá lé bàtìsimò do yí sè, ìndì kitswá lé áyi kàrí kutú. Di Tírí Lólo adré tadhá àma dré dhi, tà nda tà bàti 'i dhi nì. Tàko ko, Tírí nda tà bàti 'i.

7 Tà adrèbhá tadhá dhi, tà nda tà bàti 'i dhi na:

8 Tírí Lólo, yí ìndì kàrí. Di tà na nda ì adré ru kisú adrézó tà àlo ta kòdhya.

9 Mà adré gà tà móndí ì dré adrélé longólé dhi kì ka'ì. Di, tà Giká dré longólé dhi ína kàdrì tà nda kì lavú. Angyá ko, Giká longó tà nda áyi tàndi ni Mváagó ni tà dri.

10 Dhya ángùdhi adrélépi Giká ni Mváagó ni ka'ì dhi, dhya nda tà Giká dré longólé nda íbe í léna. Di, dhya adrélépi Giká ni ka'ì ko dhi adré ína akódhi ni bha kinzò líyí ro, dré tà Giká dré longólé áyi Mváagó ni tà dri dhi ni ka'ile ko dhi sè.

11 Di tà longólé nda, tà kònìdhi 'i: Giká afè àma dré lídrì kóná vèsè kólyá dhi, ìndì mà adré lídrì nda ni kisú akódhi ni Mváagó na.

12 Dhya ángùdhi adrélépi Giká ni Mváagó nda íbe dhi kókpà lídrì nda íbe í léna. Di, dhya

adrélépi Gìká ni Mvágó nda àko í léna dhi kókpà lídrì nda àko.

Yòwànì ni kúlì kùdù

¹³ Má adré tà kòdhi ki tisì àmi adrèbhá Gìká ni Mvágó ni ka'í dhi i dré, mì kòkìtswáró niá dhi, àmi lídrì kóná vèsè kólyá dhi íbe dhi be.

¹⁴ Tà mà dré adrélé ka'ìle bàti Gìká kandrà dhi, tà kònìdhi 'i: Mà kàdré tà zi akódhi tí ngóro dré adrélé lèle dhi tìni dhi, akódhi adré àma ki yi.

¹⁵ Dì mà dré nìle, akódhi adré àma ki yi dhi sè dhi, mà nì kpà tàle dhi, mà adré tà ángùdhi mà dré adrélé zìle akódhi tí dhi ni kisú dhi be.

¹⁶ Dhya àlo kàdré áyi adrúpi ni no adrérà'a tàkonzì 'o gò, tàkonzì nda dré adrézó dhyá ki dri lèle dràdrà kisú ko dhi, lè dhya nda kòzi tà Gìká tí akódhi nda dré gò, Gìká kòfèro lídrì akódhi dré. Má adré ngbà 'í móndyá àyi ki tàkonzì dré adrézó àyi ki dri lèle dràdrà kisú ko dhi ki tà ta kòdhyà. Tàkonzì adrélépi dhyá ki dri lèle dràdrà kisú dhi be. Má adré tàá dhi, à kàdré tà zi Gìká tí móndyá tàkonzì àsú be kònini dhi ki 'obhá dhi i dré dhi ko.

¹⁷ Tà kònzì títi adrélé 'òle dhi i, tàkonzì 'i. Dì, tàkonzì adrélépi dhyá ki dri lèle dràdrà kisú ko dhi be.

¹⁸ Mà nì tàle dhi, dhya adrélépi Gìká ni mvá ro dhi kìtswá gòle adrélé tàkonzì 'o ko dhi be. Tàko ko, Gìká ni Mvágó adré akódhi nda ni líkì gò, Dhya kònzì dré kìtswázó akódhi ni 'o kònzì ko.

¹⁹ Mà nì tàle dhi, àma móndí Gìká àdhyà 'i dhi be. Mà nì kpà, móndyá títi bvò kòndì àdhyà i Dhya kònzì ni rìnyí zàle dhi be.

²⁰ M̀à n̄i kp̀à t̀àlè d̄h̄i, Ḡiká n̄i Mv̀áagó at̄sá bv̀ò k̀ònd̄h̄i 'á g̀ò, dré t̀ògyá af̀èzo àma dré, m̀à k̀òk̄it̄swáró Ḡiká adrélépi bàti d̄h̄i n̄i ni be d̄h̄i bv̀ó. D̄i m̀à adré adrélé Ḡiká bàti nda léna, adrélé k̀ók̄p̀à akód̄h̄i n̄i Mv̀á, Yésu Kr̄isto léna. Akód̄h̄i nda Ḡiká bàti d̄h̄i 'i, ìnd̄i lídr̄i k̀óná v̀èsè k̀ólyá d̄h̄i 'i.

²¹ Ama ànz̄i i, m̀i k̀àdré àmi k̄i lík̄i ḡiká t̀àko k̄i t̀à s̀è.

Logo (Logoti)
Logoti (Logo): BUKU TA TIDHI//RU YIZO DHI ADHYA
New Testament

copyright © 2015 Wycliffe Bible Translators, Inc.

Language: Logo

Contributor: Wycliffe Bible Translators, Inc.

All rights reserved.

2025-05-10

PDF generated using Haiola and XeLaTeX on 10 May 2025 from source
files dated 10 May 2025

942af0a0-42ea-5477-8f1a-fed39823f32b